

Setembro 2018.

4 DE SETEMBRO *Día Mundial da* SAÚDE SEXUAL



Un intre da presentación. Foto: Candieira.

DÍA MUNDIAL DA SAÚDE SEXUAL 2018

O Día Mundial da Saúde Sexual (DMSS), impulsado pola Asociación Mundial para a Saúde Sexual, é unha celebración que, dende hai 40 anos, cada 4 de setembro promove unha maior conciencia social sobre a saúde sexual no mundo. A Universidade de Vigo, como institución académica de referencia e prestixio social, aposta pola promoción da saúde sexual entendida como un estado completo de benestar físico, emocional, mental e social en relación coa súa sexualidade. A sexualidade é un aspecto central do ser humano presente ao longo da súa vida e abrangue o sexo, as identidades e os papeis de xénero, a orientación sexual, o erotismo, o pracer, a intimidade e a reprodución (OMS, 2006). [+Info.](#)

DOCENTES DA EU DE ENFERMARÍA ACHEGAN ÁS MARISCADORAS BOAS PRÁCTICAS EN MATERIA DE SAÚDE

DUVI PONTEVEDRA 04/09/2018

Unha serie de recomendacións dirixidas a orientar ás mariscadoras na adquisición de rutinas saudables para o desenvolvemento da súa actividade reúnen na *Guía de cuidados da saúde para o benestar das mariscadoras*, un panel promovido polos grupos de acción local do sector pesqueiro ao abeiro do proxecto [Candieira](#). Unha guía que é o resultado das sesións de traballo que, co propósito de definir os seus contidos, un grupo de mariscadoras da Ría de Pontevedra desenvolveu co asesoramento de Paz Diéguez e Dolores Rodríguez, profesoras da Escola Universitaria de Enfermaría de Pontevedra, centro adscrito á Universidade de Vigo, así como da fisioterapeuta do Centro Galego de Tecnificación Deportiva, Eva Rosales. [+Info.](#)

UN ESTUDO PORÁ EN CIFRAS A REALIDADE E AS POTENCIALIDADES DO POLÍGONO DE SAN CIBRAO

ROSA TEDÍN DUVI OURENSE 06/09/2018

Pór en cifras a realidade e as potencialidades de futuro do Polígono de San Cibrao. Con este obxectivo un grupo de investigación da Universidade de Vigo liderado polo profesor Andrés Mazaira está a realizar un estudo que foi presentado este xoves na sede da asociación de empresarios deste polígono. A iniciativa é froito da colaboración institucional entre a Universidade, a Deputación de Ourense e a Asociación de Empresarios do Polígono de San Cibrao. [+Info.](#)



Acto de presentación do estudo.



Foto de familia do equipo de investigadoras e investigadores que participaron no estudo.

UN EQUIPO INTERNACIONAL DEMOSTRA A FORTE INTERACCIÓN ENTRE FUSIÓN DE XEOS, CIRCULACIÓN OCEÁNICA E CAMBIO CLIMÁTICO

D. BESADÍO DUVI 07/09/2018

Un novo estudo levado a cabo por un equipo internacional e no que participou o grupo de investigación Geoma, Geoloxía Mariña e Ambiental da Universidade de Vigo, analizou a composición química dos sedimentos oceánicos para revelar cambios xeneralizados na circulación do océano Atlántico relacionados con cambios climáticos de alta frecuencia durante os últimos 25 000 anos. Os resultados obtidos, [publicados agora na revista Nature Communications](#), achegan unha nova visión sobre a interacción entre a fusión dos xeos, a circulación oceánica e o cambio climático. [+Info.](#)



O acto de benvida tivo lugar na Escola de Enxeñería de Telecomunicacións.

OS CAMPUS DAN A BENVIDA A 463 NOVOS ESTUDANTES ESTRANXEIROS

M. DEL RÍO / EDUARDO MUÑIZ DUVI 13/09/2018

Os datos provisionais de alumnado estranxeiro que vai cursar parte dos seus estudos na Universidade de Vigo certifican o atractivo crecente dos tres campus entre o alumnado internacional. E é que se en setembro do ano pasado a institución académica viguesa daba a benvida a 384 estudantes, no inicio do curso 2018/2019 son xa 462, aos que deberán sumarse todas e todos aqueles que se matriculen para o segundo cuadrimestre. [+ Info](#)



Foto de familia da delegación colombiana coas responsables institucionais da Universidade de Vigo.

A UNIVERSIDADE SENTA AS BASES DE FUTURAS COLABORACIÓNS CON INSTITUCIÓNS ACADÉMICAS E EMPRESARIAIS COLOMBIANAS

M^a DEL CARMEN ECHEVARRÍA DUVI 13/09/2018

Mobilidade de estudantes, PDI e PAS; prácticas en empresas; proxectos de cooperación educativa, pero tamén nos ámbitos do desenvolvemento, a cooperación, a igualdade de xénero e responsabilidade social. Estes son algúns dos eidos nos que a Universidade de Vigo podería establecer, segundo a directora da Área de Internacionalización, Laura Movilla, colaboracións coas sete universidades colombianas do departamento de Caldas, que conforman a alianza SUMA, e nas que estudan uns 40.000 alumnos e alumnas. [+Info.](#)



Foto de familia de organizadores e patrocinadores do Pont-Up Store.

TECNOLOXÍA E MULLER EMPREENDEDORA, EIXOS DO PROGRAMA DO QUINTO PONT-UP STORE

DUVI PONTEVEDRA 13/09/2018

Máis de 40 actividades, entre coloquios, encontros ou obradoiros, que contarán coa participación de máis de 100 expertos e expertas, integran o programa da quinta edición do Pont-Up Store, o espazo de emprendemento impulsado pola Universidade de Vigo, no marco do Campus Crea S2i, co Concello de Pontevedra como patrocinador principal. Un ano máis, o evento terá como punto central a carpa que se instalará na praza de España, onde 45 empresas darán a coñecer os seus produtos e servizos e onde terán lugar diferentes actividades. "A tecnoloxía e a visualización da muller como emprendedora" son neste 2018 os dous eixos do programa. [+Info.](#)



Este venres celebrouse o acto de benvida ao alumnado estranxeiro.

O CAMPUS RECIBE A ESTUDANTES DE INTERCAMBIO DE ONCE PAÍSES

ROSA TEDÍN DUVI OURENSE 14/09/2018

41 estudantes procedentes de once países. Estas son as cifras provisionais, xa que a matrícula para o segundo cuadrimestre non está pechada, de alumnado de intercambio que este curso académico realizará parte dos seus estudos nalgún dos centros do campus de Ourense. Aos 39 estudantes que xa están no campus de Ourense para cursar nel o primeiro cuadrimestre ou todo o curso académico, a Universidade de Vigo deulle este venres a benvida. [+Info.](#)



Barcia, Morquecho, Fouces e Souto presentaron o festival na Casa das Campás.

O VI FESTIVAL VERTIXE SONORA PROPÓN NOVE CITAS COA VANGARDA SONORA EN PONTEVEDRA, VIGO E CANGAS

EDUARDO MUÑIZ DUVI PONTEVEDRA 19/09/2018

Nove citas coa música contemporánea que inclúen a estrea mundial de varias composicións por parte de artistas e formacións de diferentes países integran o programa do sexto Festival Vertixe Sonora de Creación Musical Contemporánea, que Vertixe Sonora promove xunto á Vicerreitoría e o Campus Crea S2i. Con seis propostas en Pontevedra, dúas en Vigo e un concerto en Cangas, o festival que se desenvolverá entre o 20 de setembro e o 5 de novembro arrinca este xoves no Pazo da Cultura de Pontevedra cun concerto, financiado pola Unidade de Igualdade da Universidade, que dedica o seu programa ás creacións de cinco mulleres compositoras e suma ao seu programa diferentes propostas que vinculan á música coa performance, a poesía ou o circo contemporáneo. [+Info.](#)



A exposición reúne unha serie de obras pictóricas realizadas con cadeiras de rodas.

UNHA EXPOSICIÓN AMOSA COMO AS CADEIRAS DE RODAS SON TAMÉN FERRAMENTAS PARA CREAR

DUVI PONTEVEDRA 17/09/2018

“Por que non pintades coas vosas cadeiras de rodas?”. Esta foi a proposta que Ester Gandía e Yoshimar Tello trasladaron en 2015 aos usuarios e usuarias do centro de Amencer-Aspace en Pontevedra no inicio dun taller inserido no programa de voluntariado que Belas Artes desenvolve con diferentes colectivos. A idea dos por aquel entón estudantes da facultade foi tamén o punto de partida de *El arte de nuestras huellas*, a exposición comisariada pola profesora e coordinadora deste programa de voluntariado, Loreto Blanco, que reúne na sede da Fundación Barrié na Coruña unha serie de obras pictóricas creadas polos usuarios e usuarias deste centro valéndose das súas cadeiras de rodas como ferramentas para a creación. [+Info.](#)



Kenya Gabriela Aubry impartindo un dos relatorios na Facultade de Filoloxía e Tradución.

A CÁTEDRA INTERNACIONAL JOSÉ SARAMAGO ENCHE DE ACTIVIDADES A AXENDA DE SETEMBRO

Coa organización de dúas conferencias e un coloquio internacional en Porto

D. BESADÍO DUVI 18/09/2018

Dúas conferencias na Facultade de Filoloxía e Tradución e un coloquio internacional na Universidade de Porto. Estas son as últimas actividades programadas ao abeiro da I Cátedra Internacional José Saramago da Universidade de Vigo, unha iniciativa que retoma o curso con forza e que ten a mirada posta xa nas III Xornadas Internacionais José Saramago, que este ano volverán celebrarse no campus de Pontevedra e xirarán entorno ao eixe Literatura, cinema e política. [+Info.](#)



A mostra está situada na entrada da biblioteca universitaria.

EXEMPLOS DUNHA LITERATURA INFANTIL NON SEXISTA

DUVI OURENSE 19/09/2018

Durante este mes de setembro, o recuncho temático de fomento da lectura situado na entrada da Biblioteca Rosalía de Castro do campus de Ourense acolle unha mostra de libros infantís, dirixidos a nenas e nenos de entre 3 e 10 anos, non estereotipados e non sexistas. A exposición, que pode visitarse ata o día 1 de outubro, é unha das actividades do proxecto europeo *Gender Identity: Child Readers and Library Collections, G-Book*, no que participa a Universidade de Vigo. [+Info.](#)



Organizadas desde a Área de Historia Antiga.

UNHAS XORNADAS VISIBILIZARÁN O PAPEL DA MULLER NA ANTIGÜIDADE

DUVI OURENSE 20/09/2018

A muller na antigüidade: perspectivas e reflexións. Con este título preséntase unha xornada organizada desde a Área de Historia Antiga da Universidade de Vigo que ten como obxectivo principal dar a coñecer e visibilizar o papel da muller na antigüidade. [+Info.](#)



Un intre da inauguración do quinto Pont_Up Store..

O PONT-UP STORE ENXALZA EN PONTEVEDRA A VITALIDADE DO EMPRENDEMENTO

DUVI PONTEVEDRA 21/09/2018

Poñer en valor o “talento transformador” dos emprendedores e emprendedoras é o propósito central do [Pont-Up Store](#), o encontro de emprendemento impulsado pola Universidade de Vigo, no marco do Campus Crea S2i, co Concello de Pontevedra como patrocinador principal, no que desde este venres 45 novas empresas, seleccionadas de entre 144 candidaturas, dan a coñecer os seus produtos e servizos no recinto instalado na praza de España pontevedresa. Recinto que este mediodía acolleu a inauguración dun encontro que permite demostrar tamén “que o país ten moita vitalidade”, como salientou o profesor Pedro Figueroa, presidente do comité organizador dun evento que se complementa coa organización, entre a xornada do xoves e este sábado, de máis de 40 actividades en diferentes puntos da cidade. [+Info.](#)



Imaxe de parte das e dos participantes na reunión.

CIENCIAS DA EDUCACIÓN ABRE VÍAS DE COLABORACIÓN CO CENTRO DE INVESTIGACIÓN EN EDUCACIÓN BÁSICA DE BRAGANÇA

DUVI OURENSE 21/09/2018

A Facultade de Ciencias da Educación do campus de Ourense acolleu este venres a visita dunha delegación do Centro de Investigación en Educación Básica do Instituto Politécnico de Bragança, en Portugal, que tivo como obxectivo a apertura de vías de colaboración entre as dúas entidades. A cita contou coa participación por parte do centro ourensán da súa decana, Mar García, e persoal docente e investigador. Por parte lusa, a delegación estivo encabezada pola coordinadora do centro, Cristina Mesquita, e completada polos seus membros María José Rodrigues e Mário Cardoso. [+Info.](#)

23 de SETEMBRO

Día internacional contra a explotación sexual e a trata de persoas



23 DE SETEMBRO, DÍA INTERNACIONAL CONTRA A EXPLOTACIÓN SEXUAL E O TRÁFICO DE PERSOAS

UNIVERSIDADE 23/09/2018

Unidade de Igualdade, Universidade de Vigo

A Universidade, como institución social e educativa de referencia, debe impulsar modelos de espazos libres de sexismo, misoxinia e violencias de xénero. [+Info.](#)



A matrícula en liña está aberta do 24 de setembro ao 4 de outubro.

13 OBRADOIROS E 235 PRAZAS PARA ENRIQUECER O TEMPO LIBRE

DUVI OURENSE 24/09/2018

Transcorridas unhas semanas desde o inicio do curso académico 2018/2019, desde a Área de Actividades Culturais do campus de Ourense sinalan como agora é un bo momento para que os membros da comunidade universitaria busquen oco nas súas axendas para realizar algún dos [obradoiros](#) que organizan. Este cuadrimestre son 13 as opcións que teñen, desde teatro ata intervención asistida con cans. [+Info.](#)



O ciclo ábrese o venres coa proxección de "Milou en Maio". Imaxe: Institut Français du Cinema.

OS ACONTECEMENTOS E MOVEMENTOS QUE MARCARON 1968, NO NOVO CICLO DE CINE DA VICERREITORÍA

EDUARDO MUÑIZ DUVI PONTEVEDRA 25/09/2018

1968 foi o ano das protestas do maio francés, pero tamén o da primavera de Praga e a posterior invasión de Checoslovaquia polas tropas da URSS e o ano no que foi asasinado Martin Luther King, un ano “que é como un punto nodal no que se entrecruzan unha serie de feitos históricos determinados”, como sinala Suso Novás, programador de *O vento sopra onde quere*, o novo ciclo de cinema impulsado para este outono pola Vicerreitoría do campus, que ten en 1968 e nos acontecementos e movementos sociais que marcaron aquela época o seu eixo central. “O que se pretende é ver como un determinado tipo de propostas fílmicas, unhas máis convencionais e outras menos, son quen de poñer ante o espectador unha serie de reivindicacións, algunhas máis veladas e outras máis explícitas, do que era o fin dunha década moi convulsa”, apunta Novás dun ciclo que se abre este venres 28 na Casa das Campás coa proxección de *Milou en Maio*, de Louis Malle. [+Info.](#)



FOTOGRAFÍA E XÉNERO, E ELABORACIÓN DE PAN ARTESÁN, GRANDES NOVIDADES DA NOVA OFERTA DE OBRADOIROS

D. BESADÍO DUVI 25/09/2018

Fotografía e xénero: análise de imaxes contra a desigualdade e Elaboración de pan artesán con 'formento'. Estas son as grandes novidades da [nova oferta de obradoiros](#), nove propostas formativas nas que se combinan novas propostas coas que chamar a atención da comunidade universitaria e demais persoas interesadas con outras suxestións máis tradicionais con público asegurado, como teatro ou música tradicional, ou outras alternativas que, dado o seu éxito, repiten ano tras ano (iniciación á maxia, identificación práctica de cogomelos, horta ecolóxica...). O ano pasado pasaron por estes talleres máis de 200 persoas e a previsión é igualar ou superar esta cifra. [+Info.](#)



Exemplar de polo de gaivota patiamarela (*Larus michahellis*).

COMO AFECTAN OS DETERMINANTES AMBIENTAIS AO DESENVOLVEMENTO DA GAIVOTA PATIAMARELA E DO PEIXE ESPÍÑOSO?

D. BESADÍO DUVI 25/09/2018

Como afectan os determinantes ambientais ao desenvolvemento de certos animais vertebrados? Este foi a pregunta á que o investigador Javier Díaz tratou de responder coa súa tese de doutoramento, un estudo en profundidade sobre como o sexo, o ambiente social temperá e o risco de depredación inflúen no comportamento, a coloración de camuflaxe e a expresión de xenes relacionados co estrés fisiolóxico. Centrou o seu estudo en dúas especies moi concretas: a gaivota patiamarela (*Larus michahellis*) e o peixe espiñoso (*Gasterosteus aculeatus*). [+Info.](#)



María Fernández participa explicando o seu traballo no eido da acuicultura.

UNHA INVESTIGADORA DA UVIGO, NO PROXECTO OCEÁNICAS PARA VISIBILIZAR O PAPEL DAS MULLERES NAS CIENCIAS MARIÑAS

DUVI 27/09/2018

Ángeles Alvariño foi unha das pioneiras da ciencia galega, unha das máis importantes investigadoras da historia das ciencias mariñas e, como muller, tivo que loitar contra as barreiras dunha sociedade machista e patriarcal. Faleceu en California en 2005 e foi unha inspiración para moitas mulleres oceanógrafas que na actualidade seguen a loitar por visibilizar o seu traballo. [+Info.](#)



Uqui Permui, Ánxela Caramés, María Márquez e Cristian Gradín.

UNHAS XORNADAS ANALIZAN NO CAMPUS O CÓMIC, A ANIMACIÓN E O DESEÑO GRÁFICO DESDE A PERSPECTIVA DE XÉNERO

EDUARDO MUÑOZ DUVI PONTEVEDRA 27/09/2018

O peso do visual na sociedade dixital contemporánea fai que as imaxes xoguen un “papel crucial na difusión de contidos e na fixación de estereotipos de xénero, moitas veces inconscientes pero non por iso inofensivos”. Deste xeito presentan as profesoras da Área de Didáctica da Expresión Plástica e integrantes do grupo de investigación Remoss Cristina Varela, Begoña Paz e Itziar Ezquieta o punto de partida das xornadas *Xénero, feminismo e creación visual*.

[+Info.](#)



San Teleco 2018, primeira festa universitaria cun protocolo fronte as violencias de xénero.

SAN TELECO 2018, PRIMEIRA FESTA UNIVERSITARIA CUN PROTOCOLO FRONTE ÁS VIOLENCIAS DE XÉNERO

DUVI 27/09/2018

A celebración do patrón da Escola de Enxeñaría de Telecomunicación, que comezou este mediodía e se prolongará ata as 20.00 horas nas inmediacións do centro, convértese na primeira festa da Universidade de Vigo cun protocolo fronte ás violencias de xénero. “Dende a Unidade Igualdade ofrecéronnos unha formación para levar a cabo a nosa actividade como voluntariado lila, con persoas procedentes da propia escola, pero tamén de Filoloxía, Bioloxía, Minas ou Ciencias Xurídicas, coa misión de acadar unha festa nun marco de igualdade onde todas e todos poidan disfrutar libremente”, explica Jaime González, membro da delegación de alumnos da escola na organización da festa. [+Info.](#)



Un intre da conferencia de Alberto Gutiérrez na Ecimat.

OS CAFÉS NA ECIMAT VOLVEN SERVIRSE ‘CON SAL’

DUVI 27/09/2018

Tras o parón estival, este xoves retomouse na Ecimat o [programa Cafés con Sal](#), o ciclo de conferencias abertas sobre temas de investigación mariña que se ven desenvolvendo no centro desde o ano 2011, e fíxoo coa intervención do estudante de doutoramento Alberto Gutiérrez, que impartiu a charla *Response of bacterioplankton to anthropogenic nutrient enrichment in a dynamic coastal system: Ría de Vigo*. [+Info.](#)

4 DE OUTUBRO

Día das Universidades Saudables



#Reto5mil
Súmate ao "reto 5000 doazóns"
de sangue da REUS

#IIRetoFrutaREUS
Sube a Twitter unha foto
consumindo froita

4 DE OUTUBRO DE 2018, DÍA DAS UNIVERSIDADES SAUDABLES

UNIVERSIDADE 27/09/2018

A Universidade de Vigo, membro da Rede Española de Universidades Saudables (REUS), súmase ao Día das Universidades Saudables o vindeiro xoves 4 de outubro e convida a toda a comunidade universitaria a participar en dous retos: Retro5mil e IIRetoFrutaReus. [+Info.](#)



Cancela, Miguez, Soto, Romo e Millán, no acto de apertura das xornadas.

UN SÍNDROME QUE AFECTA AO 40% DOS MAIORES E QUE PODE COMBATERSE CON ACTIVIDADE FÍSICA

EDUARDO MUÑOZ DUVI PONTEVEDRA 28/09/2018

Expertos e expertas procedentes de diferentes universidades españolas e portuguesas afondaron este venres na Facultade de Ciencias da Educación e do Deporte nos efectos na actividade física na poboación maior e nos seus beneficios á hora de previr un deterioro tanto físico como cognitivo. Fixérono no marco das xornadas *Actividade física e fragilidade*, que se insiren nas actividades da rede [Frailnet](#), que pon o foco da súa investigación na fragilidade, concepto que fai referencia a unha “situación de vulnerabilidade” previa á enfermidade, a discapacidade ou a dependencia, e que constitúe un síndrome “que afecta ata o 40% das persoas maiores de 65 anos”. [+Info.](#)

A UNIVERSIDADE ALZA A VOZ CONTRA A EXPLOTACIÓN SEXUAL, QUE MOVE EN ESPAÑA 10 MILLÓNS DE EUROS AO DÍA

DUVI PONTEVEDRA 28/09/2018

“Nesta sociedade neoliberal, o diñeiro branquea a violencia sexual, converte o desexo sexual dos homes nun dereito e o noso desexo sexual desaparece”. Son verbas de Amelia Tiganus, activista de *Feminicidio.net*, vítima durante cinco anos do tráfico de persoas e a explotación sexual en España, onde a prostitución “move 10 millóns de euros ao día”, como denunciou este venres na Casa das Campás no acto co que a Universidade conmemoraba o Día Internacional contra a explotación sexual e o tráfico de persoas, que tivo lugar o pasado domingo 23, e que se viu complementado coa inauguración da exposición *Excusas*. [+Info.](#)



A activista e vítima de trata Amelia Tiganus impartiu unha conferencia na Casa das Campás.

UNIVERSIDADE DE VIGO

Unidade de Análisis e Programas.

Anexo a xerencia.

Planta Baixa.

36310 Vigo (Pontevedra)

986.818.689 986.818.640